

## John 14:1-6

### “Asa agi?”

May tigulang nga nag-inusa ra pagpuyo. Buot unta niyang kultibahon ang luyo sa balay aron tamnag kamote. Apan lisud na kaayo sa iyang lawas ug ang bugtong niyang anak nga mao untay katimbang niya nabilanggo man. Gipahibalo niya ang iyang anak nga naglibog siyag unsay buhaton kay sa iyang panuigon lisdan na siya pagkalot sa ilang garden. Unya misulat ang iyang anak: “Tay, ayaw intawon nag kalota kay diha ra ba nako gilubong ang mga lawas.” Pagka-kaadlawon sunod adlaw miabot ang kapolisan aron pagpangita sa mga lawas. Grabeng kinalotay nila sa garden. Apan wa silay nakaplagaan ug nanlakaw sila. Niadto mismong adlaw may laing sulat nga iyang nadawat gikan sa anak. “Tay, mao ra gyud toy pamaagi nga matabangan ka nako. Karon, makapananum ka nag kamote.” Kay dili man mahimo sa anak, sa laing paagi niya napakalot ang yuta!

Sa maong sugilanon atong makita nga daghang paagi sa paglihok: daghang paagi sa pagsulat, pagdebuhog larawan, pagtukod og balay, pag-umol og bata. Kasagaran may kapilian ta sa duha ka butang: ang husto o sayop nga paagi. Apan kon espirituhanong butang na gani ang hisgutan, usa ra gayud ang husto ug tinuod nga paagi: si Kristo. Siya ra gayud ang agianan. Mao nay iyang gipadayag. Atong tutokan ang pangutana, “Hain man ang agianan?” o “Asa man agi?”

Samtang nagbiyahe sila nangutana ang babaye sa driver, “Asa man ta agi?” “Salig lang nako kay short-cut ni.” maoy tubag sa driver nga iyang bana. “Nganong di na man lang ta mohunong ug mangutana?” matud sa asawa. “Kay nasayud man kog asa agi.” tubag pud sa bana.

Kitang tanan buot mahilangit. Dili ba? Apan asa man ta agi? Makapaneguro ba ta unsaon pag-adto sa langit? Kinahanglan ba nga ako maayo gyud nga tawo, nga daghan gyud kog buhat sa kalooy, nga nagtuman ko sa Napulo ka Sugo? Ug kon makalapas kog kausa o kaduha sa kasugoan unsa may mahitabo? Unsa man gyud ko kaayo sa akong pagkatawo sumala sa gidahum gikan nako? Di ba nag-ingon man ang biblia, “Be perfect” busa unsaon man na nako? Asa man ko paingon? Unsaon man nako pag-abot sa buot adtoan? Ang kamatuoran mao nga kasagaran nasaag na ta. Apan nganong dili man ni nato angkonon? Di ba miangkon man si Tomas nga naglibog siya, nga nasaag o nawala siya? “Ginoo, wa mi masayud asa ka paingon, busa unsaon man namo pagkatultol sa dalan?” matud pa niya.

Unsa may makapasaag nato? Way lain kondili ang sala. Mao ni makapatipas nato sa gikan sa hustong dalan. Sumala sa atong kinaiya nga sad-an, dili maayo ang atong gipadulngan. “Lapad ang dalan padulong sa kalaglagaan” matud pa sa panultihon. Ang sala maoy dalan padulong sa kamatayon. Ug dulhohon kaayo ang maong dalan padulong sa kaudut nga lisod likayan. Si Jesus nga nakasabot sa atong kahimtang nasayod sa

atong gipadulngan. Apan hain na man siya, ug asa man siya padulong? Ang maong pangutana importante kaayo alang nato!

Hain ug asa man si Jesus? Dili siya sama nato nga nasaag. Si Jesus nasayud hain ang iyang padulngan. Lahi nato wa siya masaag, wa siya mawala. Sa pagpanamilit ni Jesus sa iyang mga tinun-an, nahibawo siyang biyaan niya sila sa dili madugay ug nga biyaan niya kining kalibutana. Mouli siya sa Amahan. Mausab ang iyang presensya taliwala nila. Dili na sama sa paaging ilang naandan. Nalaraw na ang iyang pagaagian. Nasayran na niya ang dalan. Ug ang maong dalan nagpadulong kanunay sa krus. Ang dalan sa Krus! Mao na ang dalan ni Jesus. Sa iyang pag-ingon nga mag-andam siyag luna alang sa iyang mga tinun-an, ang iyang gipasabot mao nga moadto siya sa krus. Ug didto sa krus, tubson ta ni Jesus gikan sa atong mga sala ug ang iyang dugo nga iula maoy bugti sa dalan padulong sa langit. Ang mga lawak sa langit alang nato didto gitukod ni Jesus sa krus. Didto sa krus ta pasaligi ni Jesus sa way katapusang pakig-uban sa Amahan. Gipangandam ta niyag luna dili sa iyang pagkayab sa langit nga, kondili didto sa iyang pag-antus ug kamatayon sa krus. Didto sa krus matapus ang iyang buhat sa kaluwasan alang nato. Nagbitay siya sa krus sa dihang miingon siya, “Natapus na.”

Sa basiyo niyang lubnganan makita unsay mahitabo nato: nga bangonon kita gikan sa lubnganan aron mabuhi. Siya ang panganay sa nangamatay ug maoy nagtudlo nato sa agianan aron makasunod ta niya. Naglingkod siya sa tuo sa Amahan, apan misaad siya nga mobalik aron kita makalatas usab sa ganghaan sa kamatayon ug mabuhi uban sa iyang himaya. Asa siya paingon? Didto sa krus. Didto siya sa krus alang nato! Didto sa kamatayon ug kabanhawan alang nato! Didto sa tuo sa Amahan alang nato! Ngano? Tungod ug lang nato! Aron mahimong atong dalan, atong kamatuoran ug atong kinabuhi!

“Ako mao ang dalan” matud ni Jesus. Klaro kaayo nga pagpadayag, “Ako ang dalan...Walay makaadto sa Amahan gawas pinaagi nako.” Nagpasabot na nga dunay pagkatalagsaon sa Kristohanong pagtoo. Dili kaayo komportable o mahiluna niini ang post-modern nga kultura karon. May mga tawo nga dili kaayo makadawat sa giangkong ni Jesus nga siya ra gayud ang dalan.

Unsa man diay atong makita sa ubang relihiyon? Makita sa Buddhism nga ang kinatumyang tumong mao ang Nirvana diin wa nay kasakit ug pag-antus. Ug ang dalan padulong sa Nirvana mao ang pagsunod sa 8 ka dalan padulong sa Enlightenment ug maabot nato ang luna nga may hingpit nga pagkawala. Sa Hinduismo, ang kinatumyang tumong mao sab ang Nirvana, apan lahi nga Nirvana. Ang Nirvana alang sa Hindu mao ang pakighiusa sa malangkubong kusog sa uniberso pinaagi sa re-incarnation. Giunsa nimo pagpuyo sa imong kinabuhi maoy giagad sa imong pagsaka o pag-os-os sa kanan. Sa Islam, ang langit usa ka paraiso sa alak, babae ug awit. Ang paglikay niining mga butanga maoy dalan sa pagkab-ot sa panalangin sa paraiso. Gawas pa niana,

kinahanglang sundon sa Muslim ang lima ka Haligi o Pillars sa Islam aron maangkon ang paraiso. Klaro nga sa Judaismo wala angkona nga si Jesus mao ang Ginoo ug nga pinaagi lang sa pagsunod sa Torah – ang balaod - nga makaangkon ang tawo og kinabuhing dayon. Apan kinsa may makahimo pagpuyo sa Balaod 100%? Busa unsa may angay nimong buhaton?

Klarong wa motakdo ang panglantaw niining mga pundok sa Kristiyanismo. Dili nila madawat si Kristo. Maoy ilang gihuptan nga ang dalan padulong sa langit o Nirvana makab-ot pinaagi sa tawhanong kusog. May mga Kristiyanos nga mouyon nga ang mga relihiyon managlahing dalan padulong sa Dios. Apan kon makab-ot nimo ang langit sa bisan unsa lang paagi basta may pagtuo lang, unsa na man lay kahulogan sa krus? Unsa na man lay kahulogan sa pagkabanhaw? Nganong gihatagan pa man nig pagtagad ni Jesus? Kon makalampus ra ko pinaagig kaugalingong paningkamot, nag-usik ra diay og panahon si Jesus. Usik ra diay ang iyang giula nga dugo? May mga Kristiyanos nga motipas dinhing bahina kay maoy ilang gihuptan nga dunay laing paagi sulod sa Kristiyanismo mismo. Pila nilay naghalad og mga pag-ampo kang San Vicente? Kang Santa Maria ug sa ubang mga santos? Kay maoy ilang gituohan nga kini sila mga dalan sab padulong sa Amahan? Dili ba nag-ingon man ang bibliya nga “may usa ka tigpataliwala sa Dios ug sa mga tawo – si JesuKristo” (1 Timothy 2:5) nga nag-ingon, “Dili kamoy nagpili kanako, ako ang nagpili kaninyo!” (John 15:16).

Ang tinuod mao nga si Jesus ra gayud ang dalan. Walay lain! Mapasalamaton ta sa Dios nga nagpaila siya nato, nagtudlo siya nato sa dalan, nga mao ang iyang kaugalingon. Salamat nga nagpadayon siyag duol nato pinaagi sa iyang pulong, nga nagpasaylo gihapon siya nato pinaagi sa bunyag, nga naglig-on gihapon siya nato diha sa atong panaw pinaagi sa balaang Eukaristiya. Pinaagi niya wala na ta mawala. Pinaagi niya ato nang makita ang balaang kahayag sa langit sa tumoy sa tunnel sa kinabuhi. Diha niya ug pinaagi ra gayud niya! Kay siya ang dalan! Si Jesus mao ang dalan nga naghatag og kahupayan nga dili makaplagan sa laing dapit. Mao nga nakaingon siya, “Ayaw kamo kasubo” kay sa atong pagsalig niya ug sa iyang Amahan, nahiluna ta sa maayong mga kamot. Kon ang atong kaugalingon maoy atong saligan, mapakyas ta. Mawala ta. Nasayod si Jesus sa dalan kay siya man ang dalan. Nagtudlo siya sa tinuod kay siya man ang Kamatuoran. Gihatagan ta niyag kinabuhi - iyang kaugalingong kinabuhi - aron ta mabuhi uban niya. Mao ni ang dalan. Mao ra ni ang dalan. Diha ni Kristo. Ang ubang paagi sa kalibutan basig mohatod ra nato sa kalibog, sama ni Tomas ug ubang mga tinun-an. Apan si Jesus mao ang dalan. Pinaagi kaniya makaila ta sa amahan. Diha niya, maato ang kamatuoran ug kinabuhi. Amen.

**+ Manny Cabajar, C.Ss. R. D.D.**  
**Obispo sa Pagadian**